

《中国铜商文化研究资料系列丛书：〈清实录〉中铜业铜政资料汇编》：

001 卷 7.雍正元年五月

甲午户部议覆：“御史单畴书条奏‘安徽、湖广承办铜斤，日久未完，恐有借词故延之弊，请敕户工二部，清查历欠铜斤，勒限完解。又从前解官，皆属微员，易于误公，宜遴选府佐家道殷实者，委令领解’，均应如所请，令各该督抚限四个月，速催完解，逾限不完，照例参处，并选贤能府佐领解。”从之。

002 卷 9.雍正元年七月

壬午贵州巡抚金世扬疏称：“黔省地僻荒陬，铜斤原无出聚，间有一二矿厂，久经封闭，若令开采鼓铸，无论工费浩大，一时难以获效。且贵州汉、苗杂处，每逢场市贸易，少则易盐，多则卖银，令使钱文，汉苗商贾，俱非情愿。若以配充兵饷，领运既难，流通无时。黔省用银沿习已久，请照旧例停开。”下部知之。

丙戌谕户部、兵部：“从前商人王纲明，因亏空铜斤银两，具呈愿采买两江、浙、闽、湖广五省营驿马匹，于每匹额价内，节省三两，填补亏空。后五省以王纲明所交之马疲瘦不堪，易于倒毙，题请仍自行采买，每匹扣银三两交部，为王纲明补垫亏空。此事虽行已数年，但各省采买，额价不敷，不能采买膘壮，营驿之马，恒至倒毙，以至地方官员，岁有赔累。况商人王纲明亏空银两与各省地方官员何涉，而代为补垫？除从前五省解部补垫银两外，以后每匹扣银着俱行豁免。其王纲明欠项着另行查明清结。”

003 卷 29.雍正三年二月

甲午江西巡抚裴度遵旨折奏：“查广信府之封禁山，相传产铜，旧名铜塘山，明代即经封禁。其中树石充塞，荒榛极目，并无沃土可以资生，亦无顽民盘踞在内。此山开则扰累，封则安宁，历有成案。康熙五十九年，铅山匪类擒获之后，此山搜查二十余日，并无藏匿。据实奏闻。”得旨：“当开，不得因循；当禁，则不宜依违。但不存贪功图利之念，实心为地方兴利除弊，何事不可为也？在秉公相度，时宜而酌定之。”004 卷 30.雍正三年三月

丁卯谕云贵总督高其倬、贵州巡抚毛文铨、提督赵坤等：“黔省狃苗最为不法。上年三四月间，辄敢蚁聚，抢夺集市，定广协副将领兵驱逐，官兵多被损伤。至八月间，抚提会调兵丁二千名，委员进剿，于九月行至定番州，兵丁强买民物，喧闹罢市。暮抵谷蔺地方，夜火不戢，又复焚毁熟苗五寨，以致民苗合围，射伤官兵。夫师出以律，乃沿途骚扰平民，激变熟苗，种种强横，何漫无法纪竟至如此！且狃苗及红、黑诸苗之巢穴，附在各州县者，种类不一，出没无常。朕意与其有事而加剿抚，孰若未事而预为计画。黔省文武各官，委靡成风，匪伊朝夕，尔等须大为整顿，身先倡率。文自司，道以至府、州、县、卫，惟抚恤是务，武自镇、协以至参、游、备、弁，惟操练是勤。务使民无派累之苦，兵无怠玩之习。将见各处向化熟苗，必皆举踵企慕，择其头目中淳良可用者，命该管官宣播恩德，加以优赉，俾各爱养所属，以备驱策。其有干纪犯科者，从而重惩，以示警戒。不一二年，内地之民，莫不感激奋励。已附之夷人，胥皆畏威怀惠。彼狃苗及红、黑诸苗，多与汉奸声气相通，自当俯首帖耳、望风惕息，犹敢纵肆猖獗乎？设有怙恶不悛者，亦必审查，果系族类众多，稔恶渠魁，始遣熟苗头目先行招抚，抚之不从，然后行知所在将弁，塞其奔逸之路，一面命熟苗头目率伊部落前往剿捕，大兵从而继之，自获全胜。所获牲畜等物，即颁赏熟苗，酬其功绩，将劳效尤着之辈，或奏请赐一职衔，如是平定一二处，则其余不待招抚而归诚恐后矣。至于直省各员，俱有火耗羨余畀之养廉，黔省钱粮额寡，耗羨无几，或以养廉不足加派民苗，然州县员缺，较他省无多，犹易为设法。莫若将各项陋规通盘查清，即以本省之所出，还济本省之公用，似属允协。闻自巡抚、提、镇，及司、道等官，各有纳粮官庄，每岁收米千百石至数十石不等。府、州、县亦间有之，此皆国家正赋，岂容私行隐占。又闻贵阳、镇远、安顺、普安四处榷税，每岁抽收一二万金，而报解正项不过数千。思南、威宁、黔西、大定、毕节等处，俱有过往牛、马、铜、盐，并落地等税，每岁可收至八九千金，少亦不下二三千

金，而报解正项，不过数百。此等府州县，养廉太觉有余。至若都匀、思州、石阡、平越、独山、麻哈、广顺、定番、清镇、安平等处养廉，又甚属不足。一省之中，丰啬悬殊，安可不为调剂？嗣后尔督抚应将各处税课逐一清查，每年盈余若干，量留该管官养廉，余者贮库，并将文武各员所占官庄交纳之米尽数贮仓，阖省钱粮、耗羨，一总提解。合此三项，通行会计。自巡抚、司、道以下，及府、州、县，分别冲僻繁简，酌定养廉之数而派与之。如此，则溥遍均平，缺美者无亏空之虞，缺苦者亦不致科累民苗，上下俱无染指，各员咸得奉公尽职矣。再者，除养廉外量存数千金贮司库，以备赏犒兵丁苗獮之用，亦未始非裨益地方之一助也。尔等其周思详议，具折陈奏，务令官民两赖，可以永久行之无弊。庶几地方宁辑，民苗乐利，以副朕怀远筹边之至意。”

……